

主編 黃靈庚 陶誠華

上海古籍出版社

金華宗譜文獻集成

8

金華宗譜文獻集成

八

東陽市委宣傳部
編

目錄

金華宗譜文獻集成（東陽宗譜三） 東陽市委宣傳部編

單國爐輯

盧

一

東陽安溪盧氏宗譜

一

東陽雅溪盧氏宗譜

二八

樓

三〇三

東陽杞國樓氏宗譜

三〇三

馬

三三一

東陽安恬馬氏宗譜

三三一

喬

三五一

東陽喬氏宗譜

三五一

沈

三五九

東陽白珏沈氏宗譜

三五九

邵

四一七

東陽紫溪邵氏宗譜

四一七

單

四五

東陽荷塘單氏宗譜

四五一

東陽清溪單氏宗譜

五八七

盧

東陽安溪盧氏宗譜

府君能之翁傳貴三十一

愚姻族家盧宅址係香桂巖九州山中脉迤邐至南北溪合流之處融結成基故其人秉中正之氣高儒雅之風且敦厚渾深以爲質謙和冲澹以爲行如愚嫻戚太親翁能之先生其最著也翁幼年以經史文章自懋壯歲以禮讓節義爲規言思可道行思可法宗黨疑難則片言折衷知交窘急則罄橐資扶諧不隨趨貞非絕俗縣尹咸給扁額以獎之而邑中紳士亦樂與投綯紆焉歲壬寅獨捐賑百石爲通都倡被惠者無窮今里下口碑猶在也惜年未及古稀乘彼白雲至帝鄉矣幸桂植三枝蘭成九畹森森堦庭之上焉今大宗譜牒告成愚以姻誼特爲之叙抑亦同桑梓素所悉知理應表微闡幽發揚沒世之芳躅故不敢引嫌以自遜也時乾隆戊辰年陽九之吉特授文林郎知四川直隸廬州江安縣事署州事隨帶軍功紀錄二次加一級年家眷姪李秀會頓首拜撰

從伯父允中府君傳貴百四十六

府君諱人厚貴百四十六其行乃富百十二從世祖諱士茂者之克家子也吾家自先世以來厚德著聞冠于閭里第仰喬公後財力瘠

微即我曾大父薄有畬田稍堪餬口無所爲餘裕也而府君承從祖之後簞瓢自給抑又釜幾生塵然俛仰一世善始令終帶索披裘竟若有榮啟期之三樂陶然自足于身者何哉蓋其爲人也辨稼穡理桑麻一勤之外無所紛其心氣不必甚銳而披星戴月如按程期力不必甚強而櫛雨沐風若忘饕虐吾聞勤而有所藉者爲功易勤而無所藉者爲力難如府君者又何有所藉與無所藉之異乎府君貌古樸落落不與人近人卒無有近府君者蓋季世以來破觚爲圓淳真道喪踴踴涼涼則去之蝸蟻沸羹則就之其勢然也中晚以還從兄輩接踵而起搢搢然力作以奉晨昏安居以定起卧府君乃稍弛其筋力頤養天年吾少時猶獲見其著繭袍披絮帽曝背簷下如古老佛一般舉動峻整未嘗近於頽唐衰憊也府君生於康熙丁亥正月十七日未時卒於乾隆癸卯八月廿四日子時享年七十七從伯母英氏婉懿淑慎如柴桑得翟濟陽得虞號稱合德生於康熙辛丑十月初三日戌時卒於乾隆乙卯正月初九日未時享年七十五合葬駱店高坵之原子四永藍永苓永莘永苞皆稱克家孫九人方綿衍而未有艾也謹爲之傳時乾隆庚戌暢月之吉從姪標頓首拜撰

從兄國俊甫傳德七十一

吾從兄諱永奇字國俊德七十一其行乃從伯父貴八十三諱人斌者之家子也自從伯父以上累世淳德著聞鶉居鵲息綽乎有北郭騷南郭子綦之風焉從伯父既儉樸持家于世無求于時無競其諄諄然播之庭訓亦曰安耕鑿勤本計耳時從兄年方壯性頗爽伉慨然曰大丈夫昂藏七尺豈能作井谷之鮒不爲鴻鵠是漸乎未幾家

業隆隆阜起雖曰人事亦由天相兄固非有范子計然之術所謂翩翩不富以其鄰者也其事二人菽水勿缺於供晨夕待命惟謹其或經紀四方蒙犯霜露旬日間稍有淹滯則曰我二人得毋念乎歸則訊問起居安否若何飲食若何然後退而行事與仲氏併心協力日邁月征有勞必先間有商酌和氣溢於眉宇時季弟年雖壯猶慈而蓄之無幾微乖迂意爾室既盈通有無稱貸來前者輒隨量而應效李士謙之遜順絕龍伯高之矜情也其性善飲淋漓酣暢興到時發聲如洪鐘動聳人聽或賓朋燕會大小戶不均拇戰相持勝負迴判則告曰汝其對壘可張吾軍遂乃拳勇以前誓不退舍而避迄今想之豪氣猶軒軒席上也兄生雍正乙巳四月初七寅時卒乾隆戊戌七月十二巳時改厝于巖口道光年間又改厝於徐庄屋側郭氏安人右手德配歌山郭氏秉性淑慎翼翼矜矜知娣姒賢明諸凡內政一聽主持如鍾郝之互相敬重無怨惡也生乾隆辛酉九月十九亥時卒乾隆己亥二月廿九戌時葬四都徐庄屋側子四樹梁樹櫟樹棠樹桁皆英英特立克自成家樹棟則于新葺宗祠在十六人之列奮迅足稱今孫七人曾孫十人繁衍且昌熾未有艾也樹梁輩以改卜有期恐素行勿彰無以示後人故爲之傳時道光七年歲次丁亥八月望前一日從弟標頓首謹撰

鄉祭酒盧國美府君傳 德百廿六

從兄諱永彥字國美晚年號曰桑一以得子七而言也吾從伯父既以敦樸立身沕沕漠漠如羲皇上人長兄國俊繼其迹克紹前徽然猶有英雋之氣至吾兄則金渾玉璞純乎天真矣其初翊其長兄力

本計謀治生不辭勞瘁則固然而菽水承歡必使二人毫無顧慮逮從伯父去世與營營從伯母居時尚經紀于外恐望切倚間則循環相代以致其就養無方之志既而家業隆起管鑰出入一聽之長兄長兄歿號咷大哭如不聊生家事直欲委之季弟猶子後不獲已主政焉其主政也若懷老子知足知止之戒絕不於分外有所希冀維時季弟年力強健諸猶子亦英英成立兄但總其成焉乾隆己亥北溪橋就祀羣議新之兄意在獨任告其家人曰時可爲必爲之不爲則亦勿見羸縮也爾時慕義實繁有徒遂領其會不果如初志其延師儒李自芳樓融照兩先生於家情文兼至前後二十餘年不少懈鴻賓燕友之造其門者罔弗殷勤款接稱貸來前者不逆計其償否隨量而予債則已之逋則紓之坦然也食指逾千因而析箸貨賄契券概置勿問唯以膏腴數十畝盡立爲祀田則曰人口衆多如指必有長短置常產可補救萬一今乃知其計慮深長非人所及不然兄之嗣子倍于伯季稍有偏私能至此乎而其於予雖曰堂從何異同胞晨昏溫語饑寒軫念一味之甘必呼與共然此猶未盡其微也一日燕坐仲子樹楣侍兄忽顧予而言曰我看汝踴躍涼涼儕輩後生未有當汝意者唯此子其庶幾乎予曰然楣果與予相隨數十年終始不變楣性頗鈍少善病呐呐不能出一語曹輩嘗非笑之以此知兄之知有子并知予也予自少壯以還内外友交凡得數人然而知我于微者無如兄即兄之以長者見稱里門族鄰罔不同聲然而知兄于微者亦唯我蓋淳德之人心必公公則生明淳德之人心必靜靜亦生明明至則揆理度義察言觀色灼若著龜夫天下之明有過於著龜者乎兄之知我于微尚有使予不忍盡其言而噉之終古者

即今日之爲兄偉輒潛然下涕也嘉慶十二年予入城謁學師李如蘭芝田同年謝雲卿醒樓時將行鄉飲酒禮以爲安得淳德君子爲此邦式予曰吾從兄某足當之矣於是具書以請兄聞之曰吾弟饒舌矣吾乃以是爲重輕乎哉兄考終嘉慶辛未五月廿六日申時距生於乾隆丁巳十一月初一日戌時享年七十有四道光六年改卜十都樓下深坑口之原堂嫂黃氏最賢明前後主內政數十年撫猶子如己子以故娣姒皆善下之其他不盡述妣終嘉慶辛未六月初六日戌時距生乾隆乙丑七月廿五日卯時享年六十有二亦前于道光四年改卜十都鳳凰山之原子七人樹榮樹楣樹構樹格樹槐樹棠樹楓女二長適歌山庠生郭鉅次適湖田華聖宅孫十八人曾孫八人楣輩嘗以窀穸未安皇皇晨夕既得改卜丐予銘其墓予類德叙情先爲傳次知吾兄嫂之必有後也于是乎書時道光六年歲在丙戌十月既望從弟標頓首拜撰

九十二老人從兄田玉甫叙傳

從兄諱永藍田玉其字德百四十其行也自從伯父圃笠園蔬耕稼自給披裘帶索綽乎有榮啓期之樂從伯母篝燈紡績殷勤佐之保有厥居舉從兄昆若季凡四人而分居長主器之稱不驚驚邕有由然矣從兄秉性淳固而秉質亦遽爾敦厚天之所以賦之者已迥異乎蒲柳之資蕭艾之榮矣其上事二人菽水承歡愛敬之忱從肺腑流出絕非外假既爲家督勤本分安本計早作夜思弗辭况瘁後仲叔季此倡彼和傑然繼起皆有以分任其勞兄亦勿弛于負擔或歲時伏臘溫語一堂所營者唯桑麻所量者唯晴雨世間事不或掛諸

口與人相接必以恭雖弱不欺雖少必作儀文度數動準諸古即有侵凌而侮之者勿動於氣勿悖於色和顏婉謝而已年歷中壽筋力弗或見其衰精神益復徵其固後生輩莫之抗無幾毫矣無老耄之態又無幾耄矣無大耋之嗟國家重熙累洽禮隆養老寰海恩覃雨受朝廷肉帛賜如登春臺消受此和風光日也夫壽豈易言者一呼一吸吐故納新調赤松之鼎和負局之丸非所以爲壽也澆漓其本性斲喪其本根混沌之竅已鑿沕穆之神勿全亦非所以爲壽也惟德握其樞算徵其應易曰受茲介福于其王母詩曰高朗令終令終有俶其庶幾循蜚氏之紀無懷氏之民歟兄既有子以供色養而樸慙之風亦復相肖孫男林立瑤環瑜珥蘭茁其芽是有後之驗也茲因諸事聿修粗陳其概以俟他日籲聞於朝登之人瑞時道光十年十一月冬至後二日從弟標頓首書于仰山堂之澹慮軒

從兄國珍甫傳德百四十九

吾從兄諱永產字國珍東菑乃其別字號僑軒行德百四十九吾從伯父貴八十三諱人斌者之季嗣也從伯父以上世昭懋德吾既于前兩從兄略陳其概若從伯父則見於章亭吳先生叙次謂其勤儉可爲家法并可爲世法似而續之者前既有兩從兄而兄則接踵後起者也兄少以端慤見稱與曹輩伍沉思獨往輒巖然爲以自立比就塾益加修飭毋叫囂毋邀放從伯父與從伯母絕愛憐之而兩從兄友愛怡怡所以撫而摩之者亦甚至方兩從兄之矜矜翼翼思有以光大其門閭而浩穰其蕃畝也時或經紀于外不遑寧處則吾兄日侍二人明發有懷敬問起居益不敢以懈而二人乃安之樂之油

油然得終其天年無少歉也其于家事長兄主政則聽之長兄仲兄主政則聽之仲兄貨財出入物力盈虛若無所關於懷者若夫春耕秋獲務及其時韭四葱三務知其數以及侯疆侯以之惟我是使者有脊有倫以相授有恩有威以相勸誠也其後食指愈繁因而析箸則又以簿券管鑰付之二子身但總其大綱而已而其於予互相欽敬初若無異於人也中年以往意氣愈投論議愈合一味之甘必呼與共嘗謂予曰汝太自苦吾爲汝憂每臘盡溫語慰問慙慙無已一日自携其錢相授曰吾今弗用汝姑用之勿矯也總計兄生平大抵勤而不瘡儉而不嗇若勞其神與百物競逐日事營營則瘡矣兄溪山邱壑白苧青衫未嘗不逍遙自在也銳其精與百物摒擋日事瑣瑣則嗇矣兄寶朋姻戚佳肴旨酒未嘗不欸洽相將也若乃好惡由中絕不外假合者傾肺腑不合者至不欲交一語又其天性然也兄考終嘉慶癸亥年二月初一日戌時距生乾隆辛酉年二月初六日子時與前從嫂吳氏恭人合葬棗樹塔之原從嫂予內之子嫡女兄也性婉懿貞靜爲名門淑善鍼繡閨閣師之然質弱力不任井臼維時仲姒賢內政皆其所主持事事就理嫂安之嫂之嬪于從兄予年纔數歲角髻耳歸寧告其伯母曰吾以妹子舉止端莊知有後爲擇所事今得之矣伯母信其言遂以歸我不數年病垂歿內子哭之哀如失所怙者兄續配吳氏舉一女適五都單魯重又續配後吳氏與何氏合葬棗樹塔之原子二長樹楹性豁達公祠之修與其列況瘁不辭季樹檐受經于予資穎能文荆璆在握自徵寶貴孫炳洸炳治炳洸炳泗炳汶曾孫培根培基培英林立繁昌未有艾孫炳滋娟秀入太學尤稱矯矯此非吾兄貽厥之力乎予欲傳次久矣茲乘

重葺家錄授筆以書之時道光庚寅冬至後二日從弟標頓首撰

鄉祭酒五軒氏叙傳澤二十九

君諱樹福字曰集先五軒其所自號乃吾從兄德千翁之主器子也少即舉止端凝勿涉于嬉游就黨塾攻詩書晨夕咕嚕之功不或間從兄性嚴峻家人嗃嗃恐或拂其意唯君有曉諭無譴責也南岑吳國墀丹崖夫子東眷韋寅敬亭先生者一時名宿君遊其門稱高足儕輩僉服其風裁爲制藝凝神定思殫研性命之至機力探道德之元奧支詞蔓語無從繞其筆端以數奇濬發巧心受嗤拙目玉韞于山珠潛于澤其實貴自在林壑淵藪間也從兄中歲以往以病酒故日近頽唐家事遂付之君君持重老成凡所籌策悉中肯綮雖必稟命而行其於頤指氣使自然吻合未幾從兄謝世而仲若季之英英林立者咸稟命于君矣又未幾而析炊仲若季之稟命於君如故也君雖於功名利祿之途脫然舍去暇日手一編於王鳳洲袁了凡兩家綱鑑互相參校謂觀成敗鑒得失莫尚於此諸子百家間亦抽閱唯小說傳奇概不過自乾隆戊戌譜乘重修君膺其任訂譌補遺揣揣小心唯恐有失予時年未及冠稱後輩如或疑信相參未之有定必從而商酌不自矜其我能爲役也嘉慶丙辰堰利之事起甲子適遭其變此族中一大劫也其時與我爲讐者勢如勍敵雖師直爲壯師曲爲老理有固然然宜靜而不宜動宜弱而不宜強或憤或驕便成蹉跌予既與君之季弟輩跋涉郡省會君則與仲氏鎮壓族衆知懼知謀外內輒合卒乃從容而底於成德益懋年益高嘉慶十四年縣大夫袁學博士李謝行鄉飲酒禮庠門啟拜席之明倫堂榮膺价

爵宜矣計君古稀之年予寄跡越城末由稱慶及乎八旬簿宦緣城欲製錦爲君壽以君固辭乃止今茲臚陳往事如在目前且由中壽躋上壽耳聰目明精神尚徵其強固即以此言爲南山之頌維視之祝亦無不可若夫欽次之工不工豈所敢知哉時道光十年五月端陽前一日餐菊子標頓首撰

太學生國泰甫叙傳

澤七十七

吾國泰甫諱樹禎者西園其號乃吾從兄德千翁之仲子也從兄性峻激治家嚴飭鮮克當其意惟君與其長兄樹福侍左右不干譴怒蓋是時年猶少也君即從長兄授句讀有所指畫輒刻意識之不敢怠予時從章亭吳先生兩人歲或一二晤輒心相欽敬若有夙緣者既而從兄以病酒故奄忽謝世且析箸其于家計遂不能不親自籌策奉老母於堂察寒煖視服食抑搔扶持兢兢焉唯恐或失事必稟命而後行且必稟命於其兄弗擅便也予既友交四方晤聚稍疎而于予家嚴傾接往還則如鍼芥之合朝夕間或有所不給君已察之形聲之表不待闕說而後知也其敬禮師儒以課其子姪輩情文備至若象山杜郁儒巍山趙懷芳皆契交而又重之以姻親與其兄主之者凡二三十年初吾從兄延丹崖吳夫子於家以畜長君後先生之爲從兄傳極言其扶植名教維持風俗大爲有力此不可謂善繼述耶賓朋胥至獻酬交錯務盡其歡不必其專在已也凡公事周旋與吾曹輩有一面之知者無不得其意以去且猶有進者乾隆甲寅議新宗祠君既在理而不苟同不苟異多方商酌不逞已私工匠之出入皿物之所需無不視如己事又其時堰利事起鄰變險歛禦侮

後先聲色有所不避予既與其季弟輩奔走於外君則與其長兄主持于內慎重老成沉機觀變謀畫輒合予或以一人赴郡省會必命其子炳芝僕被以從予謝之則曰遭家不造患難與同吾不忍子之獨蒙霜露也嗟夫士君子列名太學所以傑然表異于人者豈唯是西序飄纓東膠束帶斤斤於文章雒誦間乎郭振以富而賑人何蕃以貧而均物陳東則感憤上書皆豪傑也以君謙謙令德何敢上擬古人然吾以爲果毅沉敏見義必爲見害不避卒能伸其志而終有成孰謂古今人不相及耶淑配徐氏最賢明其閨內所規畫與閨外無不合蓋能持大綱知大體而爲輔佐所必不可少者不止謹脂膏議酒食蠶桑組織而已也子二長即炳芝從予遊氣象深潛次炳蘭亦從予遊性情淳固女一適華溪虞效素孫九人曾孫二人四世一堂康強逢吉矣國琛人瑞之稱君殆庶幾乎道光庚寅冬至後三日餐菊子標撰于寧海學署之澹慮軒

壽母貴二百四十三金氏暨媳貞節德二百四十九金氏傳

古者姑從而慈婦聽而婉晏子善之余謂此禮之常也其如遭辰龔險飲血茹荼孤帷子處蜚語贅情姑若不得於度紀婦若不得於矢貞而乃勃谿不聞各正身志內外肅如者吾於定溪盧氏家幾見之盧正美公之德配曰金氏女丈夫也爲其子雲嵐公擇配數年乃於仲兄之長女卜吉而聘之稱佳耦焉初正美公以農事起家梓艸杞土手足胼胝往往杜門不通水火人亦無有爲推轂者金氏於中饋之外任以門戶之事以德爲才非其才之不足也事尊長以孝和妯

嫗以敬躬織紡以勤恤孤貧則量己之力親比鄰則獎人之能支持家政耳目聰明晏然九十餘年而禦侮不侵業亦漸起皆其德之施而壽之曼也已厥後雲嵐公之娶婦氏也氏年未及笄姑撫之如已出氏亦惟奉姑之所教而勤勤女紅紉緘浣補一無怠容迨至合卺禮成燕好如賓雞鳴奉盥承事甘旨問寒燠時抑搔無少問焉未幾雲嵐公嬰疾奄奄床第不數日忽逝氏則擊篋田田如壤墻然甚不欲於帷帳之間苟延頃刻不即從於地下也若姑再三諭之曰吾老矣爾有弱子撫字無人吾家其無炊火乎氏乃忍淚飲泣遂具喪葬悉中禮節間有覬覦之者騙欺凌壓如不能容氏惟深錮靜居矢志靡他其外事悉奉若姑主之則固金石之心堅雪霜之操非張禮脩之姑而厚愛彌摯非樂羊子之妻而勤養勿倦況施洪釐躋足可待矣道光丙戌之秋邑修志乘縣大夫聞而載登之彤管遺徽不幾千載乎僕幸交於其子樹樾嘗述祖母之賢與若母之節守也丐余傳余固知德盛者業必昌志潔者名必芳安得以譴陋不文辭哉是爲傳大清道光歲次庚寅春初上澣之吉竹薌胡筠拜撰

趙氏安人苦節傳 德二百廿八

堂嫂趙氏安人之歸我兄魁古氏也年逾笄矣方其問名時兩家雖中落而門楣光概未之易也至此則莫雁迎門禮幾不備輦革輦絲曾何足云吾兄耕稼事蹉跎於早歲及伯父病奄床蓐侍湯藥奉起居無暇爲治生計并無可爲治生計嫂入門粗而操井臼細而事針指謂是於陵有偶辟繡易粟耶不過傭女紅度朝夕耐此饑寒焉耳次第舉有二子貧益甚無幾堂兄歿殯殮事二堂兄任之無幾二堂

兄又沒失依賴矣予既營營朝夕心焉存之竊以不克資助爲忝嫂即累日槁餓絕不咨告於我蓋深知我之不能爲謀而隱之忍之安夫命之不猶而已矣後年垂邁予薄宦緱城稍稍致訊問而嫂輒謝人間世矣嫂生乾隆甲戌三月初六日辰時卒道光乙酉九月十六日申時享年七十七葬槎樹園之原子二樹蕙樹衡先嫂孫二人炳高炳才今頗有成立嗚呼嫂苦節自貞終始數十年卒無一日之娛尚冀奕世繁昌墓田之祭聊補生前耳言至此潸然出涕益愴于心時道光七年丁亥寒食前二日從弟標頓首謹撰

節母王氏安人傳 澤二十六

節母王氏安人吾從姪諱樹珍字君聘者之配也其姑亦氏王從富川來歸吾從兄永賢甫廿九歲甫舉子君聘一人年不及遐而沒氏守之逮至君聘稍有所樹立舉子一人曰炳海字日初遂酷意詩書商於吾父延章亭吳先生課之期大有成無幾奄病忽不祿氏則籲天哀號竟與其姑瑩瑩困苦稱兩代嫠婦矣其姑精力強健事無論巨細舉重若輕刻不憊氏質肥而弱善病不耐操作精鍼繡垂簾爲閨閣師維時日初年喻龢工力奮矣姑乃以日者言謂是子事詩書必有一闕遂決意捨去雖以吾父及章亭先生勸不聽後日初忽忽涉歧黃家言精于醫不計功不計利四方延請沓至忽面氏則次第以告日初無少漏蓋一以濟物爲念所謂是母有是子也乾隆甲寅議新宗祠羣以主帳推日初用是合計于氏室者無虛日氏年且老矣夜分更深竄下伺茶水惟謹無一夕先就枕席者工匠錯集皿物亟需罔不快然以應未幾堰利之事起益允雜矣合計于氏室者如

故氏所以應之者亦如故前事際其通而後事乘其變方且坦然知事之必底于成而毫無疑慮可不謂明炳幾先耶抑女中丈夫矣若乃日初之於予均財物或且同勞勢無刻在氏意中者茲不盡述也氏生乾隆戊午十二月初九日酉時卒嘉慶庚辰八月二十日午時享年八十有三葬本處下後店之原子一人即日初性耿介不私舉業雖廢勤學能詩爲世重於今茲秋仲舉有一子里黨皆稱慶氏與其姑胥相慰於地下而吾從兄永賢甫與君聘之靈抑亦可以無憾矣乎遂爲傳時道光十年十一月廿一日餐菊子標頓首拜撰

式穀堂記

天地美利之源含毓不深者流澤易匱森發之機培養不固者枝幹易枯故欲樹可大可久之模貽之子若孫世世相仍未有不從宥密內葆其樸儲其精以爲於前者彰美於後也邑東安溪盧氏世稱巨族其先世文武傳芳忠良濟美由永康靈山石馬卜築于茲固與錦溪盧氏世講宗盟者也有惟清惟龍惟明惟敏翁者景仰前修矢心種德慮或替于後以一生志願觸目惕衷祈垂永久堂構初竣名其堂曰式穀今歲修緝譜牒錦溪二三社友因令叔祖穎陽同事之請求記於余余曰翁之賢雖知之素翁式穀之意雖識其微但管窺蠡測不能以華袞重人況不文而颺言不幾以蕪萎累而翁乎友生曰翁與余宗誼屬連枝世稱夙好肖其神實其實表式穀之願焉足矣奚用月露連篇字韻爭奇哉因舉式穀之意而概言之業連阡陌翁不以爲豐構麗丹塗翁不以爲榮詩書積案子孫未必能讓金玉盈箱子孫未必能守惟□美之原厚集於躬孝友奉先謙和處衆樂施

而濟世謹凜以懷刑玄黃之戰不以擾其衷觸藩之憂不以驚其慮棲遲澗谷飛觴林壑身逸而神休也訓以義方課以勤儉氣雍而禮肅也秀眉皓首義冠博帶壽考而且甯也以一身之穀貽之奕世子若孫熟而習焉用而不竭費而日新吾翁式穀之意其在斯乎其在斯乎詩云令終有俶謂善終者必先其始今日者內助得人名門厥配賢淑齊眉堂內之椿萱也雁行秩秩雍睦無虧堂內之棠棣也令器濟濟家聲克振堂內之芝蘭也且曰克者制藝吐性命以爲光匯經子以爲液行將爲珪璋登之廊廟又臺內之寶樹也翁式穀而似之者眼前已若此矣夫翁之壽杖國杖朝添海屋之籌翁之胤俾昌俾熾生寶牒之光綿綿不絕衍慶無疆又甯可量也流深而澤長本固而枝暢理固必然豈余虛揚其說以譽翁哉至若草率不韻未能秀美而文則責在錦溪二三諸社友暨穎陽翁也時竹牕夜雨舉筆謾誕緬想高誼不勝神馳時崇禎辛未菊月上浣之吉賜進士第刑科給事中兵部尚書眷生玉筍張國維拜撰

慕松盧先生花樹記

慕松先生者雙溪人也其先世由永康之石馬遷而卜築於茲土孫枝繁衍獨先生丰姿挺挺賦性亭亭遊心山水間適志烟霞內既老壘一小樹時栽名花以自娛竊嘗據而論之大凡君子之號其名者表其實也先生既以慕松自號矣將所種者在乎參天後凋之類而羣花艷冶胡足眩心而使之變易素慕乎蓋花雖侈靡而於中或有隱逸者或有富貴者此樹羣而聚之意先生以隱逸自居而以富貴者望後裔也至若春蘭放而清芬秋菊舒而清逸牡丹清艷芍藥清

標雖四時天開之景而總以寫先生生活潑之機是爲記時崇禎辛未一陽月賜進士第出身吏部觀政養生趙明鋒拜贈

重建新祠堂記

古先王立廟享親無下逮庶人之典自宋大儒諸子創爲祠堂之制俾有四親之祀此禮緣義起然後盡於人心者也世有豐其室而略於祠者君子以爲忘所自吾宗系五季周工尚定國上將軍宋封越國公後第十世祖宗的公由麗州石馬來遷嗣是思孟公遂以巡司効職汝猷公遂以進士起家時肇造有祠見之家牒在今三多里古井之西但莫稽其歲月矣其後明季天啟年間厄于游光復有三角園之建且有大宗祠小宗祠之別紀載頗略莫之詳也今茲締造蓋自國初以來諸先進相度基址辨位審方前有堂後有寢中有庭規模不爲卑陋間亦不時修葺嘉慶初舊司其事者因循不振日就頽圯羣子姓登堂時祭愀然不安于心思有以革故鼎新一伸繼述於是十六人共相計議雖以予之不敏亦與列焉然而財力綿蕞公產賦稅所入每歲不過數十金合以十六人及公私所捐亦不越數百金補苴易而恢廓難於是期以十年權數百金之生息爲之取材於山又以根柯片段之未適于用者質化爲財悉心籌策而羣子孫供膳之勤搬運之力罔勿奔走以集事嘉慶乙丑成後寢中庭二十六楹踰年丁卯成堂二十楹其門塾東西廂則稍俟諸後夫祠既新矣而事之有其禮歲事修矣而行之有其本朱徽國家禮所載出入必告朔望必參俗節之獻四仲忌日之祭至爲明備凡齋戒之誠愛敬之至所以事亡猶存者灼見於禮經祭義諸篇使祠備而禮弗行虛

器焉耳祭舉而敬弗存虛文焉耳孰謂君子之事親固將精神志意相爲流通而可不慎諸此耶故于其成也遂書以爲記時嘉慶十四年歲在己巳仲春吉旦越國公二十七世孫標頓首拜謹撰重建新宗祠董事十六人名次人鑑樹禎永宗樹棟永曙樹模永儀樹楣永魯樹禧永宅樹楹永苞炳海永家炳炯

公祠附祀記

事有經有權聖火重之公祠也而附祭行焉權而不離乎經者也是故世族大家租田逾萬畝口逾千財非不豐且厚皆有此例所以然者如其後人爲先人計則廣慈孝之心使之得有所藉以伸其報効也如其爲及身計則推樂善之情使之得有所資以立其修爲也不然則慈孝之心無自而廣矣樂善之情無自而推矣夫家與國一理也今之修葺學宮建造書院與創津梁諸美舉費苟逾千朝廷必有所獎給其重者又賜之官銜凡云勸也是故大力者上且有裨於國次即有裨于家家以宗祖爲重人能以尊祖敬宗爲念則家道興矣且祖宗無不愛其子孫而引之一堂人知父母之愛其子而不知祖宗愛之其子孫其情一也是之謂權而不離乎經者也遂爲記時道光十年九月上旬餐菊子撰

義成祠碑記

義成祠者所以祀無主之主於有主者也其義無論內外姓懿親屬戚羈客窮人略可識其諱號年月者皆人焉夫明爲禮樂幽爲鬼神鬼無所依其神嘗依於主有主則室以藏之龕以居之薦以馨香靈

爽昭格春秋傳曰鬼有所歸乃不爲厲是之謂矣間攷諸古公厲泰厲之祭肇自成周而鄭康成之計三禮曰漢民間皆祀厲則是祭之通於上下其明證也後世此典不行明太祖洪武八年始詔天下省會州郡縣皆立厲壇民間立鄉厲壇即以其鄉之父老主之夫壇而不屋國典所頒義盡於此不能以復加者也民間因祭而有壇因壇而有祠則懃懃無已充義以至于盡者也嘉慶年間邑城之西關好義者建有前後兩寢併置祀田近日登諸新志蓋示勸也吾族嗣道光元年間爲首房族弟永宣永聰永宏永宇房族姪樹檣樹琇炳煜等非有衣祖食稅之饒也釀成義會亦非有輸布捐金之夥也不辭勞瘁圖度晨夕權數年之生息爲之可謂難矣既有祠必有祭祭無田不可以久房弟永宣撥租田幾畝忠房永聚地一片佐之其基址即係常業並載碑後昭示永久若夫祭期之見於國典則三月寒食節七月望中元十月朔下元民間義薦如其俗尚或不拘云時道光四年歲在甲申八月上旬餐菊子撰計開義會名次并助錢謙四十三公助錢十七千信二百廿二公助錢十五千永魯

北溪義渡橋梁記

港有橋步有渡二者交相濟而不容以偏廢者也春夏之交利用渡秋冬之交利用橋不橋則霜肅風饕苦病涉矣不渡則濤掀浪疊怵望洋矣不寧惟是肇建一時逡巡苟且無以爲善後計俄且朽腐絀索何施俄且罅漏衣衲何補其終於廢弛而不振必然也吾族介居兩溪間水之來自南者約百餘里向有義渡渡有田載在郡邑志廢於明末國朝康熙癸卯吾曾大父行我公偕族祖行演東公華宇公

若而人復之然無橋乾隆丁丑吾伯父與吾父捐田成之併勒諸石若北溪則迤邐七十里至此勢視南少殺向有橋無渡邇來春霖夏潦迷漫中野前漲未平後漲洊至橋被漂去動輒經旬不可猝復蓋泥淤沙積旁溢而橫出猶之南矣乾隆癸卯族兄永培倡謀于衆衆志僉同踴躍從事於是輸財者即以之爲舟費輸田者即以之爲舟子工食費耶須賴焉踰嘉慶二十年乙亥族內各房以及族父行族兄族姪輩助田助橋助錢者例名於左又以橋之舊製苛簡相仍偃仄日甚糾成義會去故鼎新較量尺寸橫闊倍之親自鳩工葺材孔力視南溪之附於舟子又較善焉夫作事謀始書勗也圖維厥終善因也既濟得占小亨習坎行乃有尚也統論兩溪北溪發源東曰與南之發源大盤其勢皆據東陽江數百里之上流最爲迅急麥黃桃花河津髣髴是故橋用木而不宜於石渡用篙而不利於櫂勢使然也因勢乘便矢之以慎持之以勤習之以稔要之以恒其庶幾交相濟而不廢矣乎是爲記大清道光元年歲在辛巳孟春上澣之吉雙溪居士標撰

盧菊人先生請崇祀鄉賢錄

盧標號菊人特立獨行介然自持人呼爲盧鐵人乾隆庚戌以拔萃科試禮部時宰相和申聞標名招致之不往喉禮部冊注知縣用意標當留都而標棄之南旋後司論甯海日與諸生講求讀書爲人之學第一重行己有恥時時以刻苦真實自勵勵人藜羹藿飯卧屋板不席以詩文謁者必諄諄詳爲指示介以贊不受有舅訟甥者甥故生員豪於貲縣尹知標貧甚罰鍰移諸學標驚曰倫理之變咎在司

教跪甥明倫堂嚴訓之聲淚俱下責以夏楚返其金舅甥俱感泣不踰年教化大洽甯庠士奉主名宦祠生祀之乞歸後貧窶如故而志氣怡然嘗語子姓曰疏食飲水儒素家風慎勿以飢寒改節易行所著婺志粹婺詩補寶婺碎金定溪詩集摭懷編等書已梓行崇祀白雲書院修職郎候選教諭後學張振珂稿

義成祠對聯

天道難知原始返終謾鬱伊而呵壁
春官有典由仁祖義謹率此以崇壇
匾 慎毋忽諸

允亭公贊 忠百一

幽姿鶴矯峻節松青春標靄靄玉立亭亭重門洞闢朋牖常扃自天炯照還我虛靈捫心似鏡守口如瓶妍媸雖辨臧否何形提携杖策考論六經水環雙帶墩踞七星白鷗近狎黃鸝靜聽徘徊日晷頤養天齡是徵逢吉曷不康寧時萬曆己酉嘉平賜進士第吏科給事中俞安性贊

允亭忠一百一德配宣氏安人贊

儀親莫雁兆卜飛鳳問關車轄委蛇豫衣匪容是飾惟德之徽清心比蕙柔質如韋敦牟必謹箕帚無違和顏娣姒鬢髮簾帷易書以珥示學於機殷勤刀尺眷戀餘暉婦儀舟道軌式庭闈例之往古譙國庶幾時萬曆己酉嘉平賜進士第吏科給事中俞安性贊

長堤和百三盧府君贊

大儀幹運仁主春熙秉其德者寬厚自持懿維府君粹色冲姿以恬以密何慮何思韶風拂檻皎月臨池醅醪之飲沁人人脾吁嗟叔世淳風日漓過剛則折涉險必類渠如守道福生有基根本蟠固條達其枝是宜來者弗替引之時萬曆七年歲躔己卯仲夏丁丑科進士新任武進縣事黃承贊題

長堤和百三德配施氏安人贊

兩儀剖判倫昭儷升德音來括乃克欽承恭維安人柔順內凝葛單谷密蘋薦溪澄澄澣衣非薄綸祭是馨遂膺後祿克享遐齡芝蘭鬱茂玉樹葱青厚稱地媼貺啟天靈式瞻清懿婺宿精煢時萬曆七年歲次己卯仲夏上丁丑科進士任武進縣事黃承贊題

東橋公良五十二府君像贊

提躬溫栗制行端方家稱孝友邦頌善良既優游於定水乃含耀而勿光以齒德之隆邵爰式燕於上庠夫累德兮既厚而衍慶兮斯長宜其享乎身者寵膺章服富壽而康裕乎後者家聲丕振祚胤其昌眷晚生鶴巖王乾章敬題

良五十二徐氏安人像贊

五倫端始二物作經職膺坤載道在順成恭維安人婉孌淑貞巾綦裙布簪蒿帚荆順承姑舅棗栗將誠式和娣姒蘭苣協馨詎惟刺繡

列錦鮮明尚勤報問雜佩瓏玲春松比茂朝槿慙榮享有遐福疇與其京衷白山人斯一緒拜撰

富三百十二金氏安人像贊

富字府君絃續金氏數屬三索亦云樂只晨昏定省敬事舅姑羹湯寒暖親執盤盂如占熊夢亦可喜歡如卜羅兆亦堪悲酸箴嘗線續女功克勤端莊靜一婦德足聞家室之中積聚務矣妯娌之間和睦稱矣俾壽而富俾壽而臧有田立祀食報無疆時嘉慶庚申孟陬月之吉姪孫標頓首百拜撰

鄉祭酒人斌府君贊并叙貴八十三

曩者老萊耕於蒙山寇先釣於睢水彼皆引分自裁不與物爲營競者也府君秉淳慤之姿完其祇植體羸弱善病而肩勞策影無或後時若乃裴褻偃仰棄所好以因人熱府君弗爲居恒以仁讓課其子曰有德守則貧不懾矣有禮施則富不矜矣年就高神氣愈粹縣大夫席之明倫堂爲邦國儀渠而府君穆如也贊曰疏仡云遙澆風下黷孰反其淳不雕不琢府君閎約隱鶉居抗厲希古言息其廬春隴披煙秋畦采菽決絕外綠翹然止足仁讓之道貽示後人牖箴庭誥拱壁比珍啟拜庠門審維長者筐禁尊壹禮儀沃若我思懿德誰與爲徒蒙山睢水亶其然乎

閩範吳氏安人贊并叙

職外教者陽陽主健職內教者陰陰主順然而旨蓄禦冬條枚遵汝

義勤厲勤女誠曰不辭劇易手跡整理斯之謂矣安人之歸我公既油油然奉其舅姑特謹乃精於幹家麻枲絺苧蹶焉就緒不或視聽陝輸專心正色以持之夫是以內教修而敬順備也舉丈夫子三女子一今孫曾指數百矣綰綽多福安人有焉贊曰我思坤德載物承乾黃中通理有美弗專分既代終利貞則吉不秉勤勞曷稱巾櫛安人隄勉謹奉清塵脂膏滌滌婦道振振蚤繅而緒蚤織而縷無或失時以陰以雨富家用卜仰藉嚴明穀貽孫子九族騰聲有像在堂丹青未蝕庶幾來者勉其厲翼時乾隆壬子仲冬從姪孫標頓首謹撰

鄉祭酒貴百四十六府君贊

隆其貌與人接而非足恭也澹其神與物遇而非疎慵也行必謹于跬步動則有功也言弗咸其頰舌默足以容也食惟適口秋宜韭而春宜菰也衣惟適體葛宜夏而裘宜冬也但願桑麻之長不求庾廩之豐齊是非於馬指忘得失於雞蟲庶下軼白浪紅塵之季世而上希軒義巢燧之高風

貴百四十六吳氏安人贊

酒漿不忘所有職而瓶罄爲憂也蠶桑不忘所有事而筐懿是求也組紉豈五紋必備而線續宜籌也燔炮豈八珍是議而饘粥宜稠也女工既飭坤道能修奉舅姑則有嚴有翼和妯娌則無怨無尤禮佐夫君手挽行車之鹿教臻嗣子指嚴畫荻之歐□帟帷而著熒煒彤管以揚休嘉慶十八年歲躔癸酉臘月上澣從姪孫標頓首拜撰

貴三百三十府君贊

振儒以父輩行爲余著錄弟子束髮親句讀既學爲文與詩日摩月刮力底於成卒不得少騁其驥足以死悲夫夫振儒之所見許於余者無機械心無敖暴氣評其品行一淳字當之詩文亦然而卒不驗抑別有故歟假使振儒尚存其爲學必有裨於余以之振澆式靡扶持族鄰同志之助也振儒後吾無復可與言者矣爲贊曰得性於天不漓其始截僞續真善人根柢修身見世豈在文章神滂味厚亦與翔翱力壯不回天奪之算命也如何英雄氣短維祝予歎鬱鬱有年昭示來者寄之筆箋時嘉慶丙子臘月下泮菊人標題

貴三百三十節母施氏壽容贊并小序

氏年及笄以名家媛歸我安溪振儒時振儒從予遊謂將驥首雲衢博一衿以光宗社也未幾病病輒奄以時日其伯仲氏絕愛憐之氏則籲天請代而已侍湯藥扶起居固無乎弗至疾既革擗踴哀號喪葬如其禮撫二子期於成立庭訓最嚴其刻苦有爲人所不忍述者道光六年邑志新修遂見採錄振儒之靈亦胥慰於九京矣贊曰端莊靜一閨壺之賢恩隆合好琴瑟調絃無奈良人膺斯戾疾藥鼎湯爐求醫日急既而不起訣別涕漣逝將死殉忝竊生延有子呱呱分當閨鬻課讀耕怵怵心曲茹荼集蓼亦越有年志書紀載公論昭然國典崇褒人倫軌式尚當籲問樹之貞碣時大清道光歲次丁亥重九日餐菊子題

鄉祭酒碩庭府君像贊并叙 德百二十六

吾從兄碩庭府君中歲以還繼其伯氏主家政合內外數百指均食均衣旁皇周浹和氣集而乖氣潛消蓋積誠有以致之也稍晚管鑰遂付之兒曹惟大義所在就取裁焉其於標友愛之旨味必共嘗歡戚通於寤寐又非辭翰所能盡者謹爲贊曰世不皇古人心日漓飾言飾色狙詐險巇淳氣相守誰則以之惟我從兄惻怛仁慈不參以僞不間以私如完太璞如飲醕醑春風駘蕩化日恬熙無懷葛天今一見之追摹作贊匪有溢詞時大清道光三年癸未仲冬中旬之吉從弟標頓首拜撰

大閩範黃氏安人像贊并叙

我從嫂氏年未笄歸我從兄碩庭府君以積勤起家舅姑愛重之娣姒服其德閩內事悉委而聽命焉嫂氏弱者撫之孤者鞠之成者飲食而教育之力殫神疲弗卹也他譙姻鄰禮師儒一足爲閩閩法標或勞涉風塵旅次中有必需者嫂氏豫籌及之合銘感不忘也謹爲贊曰坤道順成章含內美惟德不瑕庶幾臻此善心曰竊我從嫂氏孝於尊嫜穌於妯娌保抱維持遍數百指一勞是司諸務就理翼翼矜矜小心終始植福者厚施於孫子丹青不渝來者諦視時大清道光三年癸未仲冬中旬之吉從弟標頓首拜撰

鄉祭酒僑軒府君贊并叙 德百四十九

晉之阮嗣宗能爲青白眼彼蓋秉於天者然好斯戚惡斯否矣我從